



**Wir trauern um unser langjähriges Vereinsmitglied Rosemarie Pawlowsky, die am 28.5.21 verstorben ist. Mit ihren Aktivitäten hat sie unser Vereinsleben maßgeblich bereichert. Wir werden sie stets in ehrendem Gedenken behalten. Der Vorstand**

**E paar Hinweis for unnern Spiele-Hutznobnd in Q-Stall:**

Wer teilnamme will, der möcht siech bitte aamaldn bis

**Freitag, 25.6. im Museum, Tel. 2141**

Wer als Fahrer mitwirkn kaa, bitte ebenfalls maldn. Mir wern dann telefonisch mitteiln, wer mit wem zun Q-Stall un wieder eham befördert werd.



*Wer ewos of sein Harzn hat, dar kaa dorwagn emol aarufn, entweder bein Matthias 2666 oder bein Schmidt 2395!*



Erzgebirgischer Heimatverein  
Eibenstock e.V.  
Otto-Findeisen-Str. 14  
08309 Eibenstock

Tel. 037752 / 2666 oder 2141  
Internet:  
www.heimatverein-eibenstock.de

Bankverbindung:  
Erzgebirgssparkasse  
IBAN: DE90 8705 4000 3892 2072 58  
BIC: WELADED1STB

# Unner Blatt`l



Nummer  
196

Mitteilungsblatt des  
Erzgebirgischen Heimatvereines  
Eibenstock e.V.

Juli  
2021



*Unner Matthias hat neierdings sei E-Baickl for de Gesundhaat entdeckt!*

## *Dor Virus hat siech zerickgezugn – hoffntlich ganz weit wag !*

Nu wolln mir aa endlich wieder mit Schwung un Elan in unner Voreinslaabn neistartn!

Endlich sei aa in unnern Arzgebirgskreis des Aasteckzohln esu weit zerieckgange, des mor wieder nooch de Vorgabn vu unnerer Bunds-behörd zamkumme derfn!

De meestn sei ja inzwischn (hoffntlich) schu is zweete mol bespritzt wurn – mit welchn Impfereistoff aa immer. Oder e paar vu uns, die dar Virus direkt gepackt hat, sei wieder „geneesn“ un hoffntlich wieder ganz gesund!



Also, lange Red is kurzer Sinn:

Mir startn voll durch un traffn uns gelei is erschte Mol wieder hintn an un in Q-Stall. Diesmol net mit nern leber-raschungsgast, naa, diesmol söllt ihr salberscht eweng mitmachn oder aa blus zuguckn. Un zwar bei allerlei Wild-West-Spielerein.

Ihr braucht aber kaane Angst ze ham – in ehemalschn Trump ham mir net mit eigelodn!

Ewos ze Assn un ze Trinkn werds bei dor Ulrike aa gabn, de bestn Voraussetzinge for in gutn Spiel-Hutznobnd sei also ganz sicher.

De Hie- un Hamfahrrerei wird nu aa schu wieder klappn.

Un gelei an 14. Juli schlogn mir zu



un genne, wie mors seit vieln gutn Gahrn gewehnt sei, nauf in unner Voreinshaus ze unnerer Gisela samt ihrer ganzn Halferschar! Die freie siech nämlich aa drauf, des endlich wieder Lust un Labn in ihr Gemäuer eiziehe kaa! Do werds eweng schiene Musik gabn un ze dorzähl'n ham mir ja subesu allerhand. Un dann giehts in nächstn Tog schu gelei wetter: ....



## *Wir gratulieren unseren Heimatfreunden*

<i>Else Barth</i>	<i>am 29.07.</i>	<i>zum 92. Geburtstag</i>
<i>Annita Einsiedel</i>	<i>am 29.07.</i>	<i>zum 83. Geburtstag</i>
<i>Katrin Jung</i>	<i>am 30.07.</i>	<i>zum 55. Geburtstag</i>



*Man muss auf anständige Weise verstehen, älter zu werden, um die Chance zu wahren, jung zu bleiben*

*- T. Heuss -*

## *Glückauf ihr Leit -is is su weit !!!*

*Lang dorsehnt – des Wartn is vorbei!  
Unnre Geduld zohlt siech nu aus:*

*Dor erschte Treff 2021 stieht vor dor Tür,  
des haaßt, vor ne Q-Stall!*

*Mir traffn uns am erschtn Donnerstich im Monat  
~ ganz wie siechs gehärt –*

*am 01. Juli, 17.00 Uhr*

*im Q-Stall  
zen zinfischn Spiel – un Hutznobnd  
(weitere Hinweise beachtn auf Seite 8)*

*Aber des is noch net allis in Juli:*


*Mir wolln uns aa wieder emol in Vereinshaus traffn,  
un zwar gelei an 14. Juli, 18.00 Uhr  
mit Musik un guter Laune!*

## Des derfst de net vorgassn

Bissl schnell in Barg nauf gehetzt,  
außer Otten hob iech ins Gros miech gesetzt,  
im miech e paar Minutn auszeruhe. ~  
Als iech nunnerguck of meine Schuh  
gewahr iech, des do wos Griens draufhockt,  
des mei Interess besonnerch aalockt. ~  
Gelei dorkenn iech an dor schlankn Fichur,  
dessis ne Schmaragdeidechs is, die sich nur  
of meine sonnewarme Schuh hot gesetzt.  
Vielleicht hat se siech aa – wie iech ogehetzt!  
Iech vorhalt miech ganz ruhich, bleib schie still,  
weil iech des Tierle ja beobachtn will. ~  
Zenächst faszeniert miech des schlanke Gestalt,  
un dann fesseln miech de Farbun de Aagn halt,  
die wie zwee dunkle Rubinle blitzn, ~  
do wolln zwee Ameisle vorieberflitzn.  
När dar enn is dor Spaziergang gelunge:  
des annere hat se mit flinkor Zunge  
blitzschnell un aa voll dorwischt,  
un siech salberst ne Delikatess aufgetischt. ~  
Noch e Weil blieb de Eidechs bei mir sitzn,  
dann tat se ins Gros nei flitzn  
un hat siech in Ardreich sicher vorsteckt,  
des se kaa annersch Vieschzeich entdeckt. ~

Su isis nu amol of unnerer Walt  
~ un des net när im Tierreich – bestellt:  
„Dor Klaane wird vu de Grußn gefrassn,  
un des derfste dei Labn lang net vorgassn!“

vom W. Auerswald (Mai 2007),  
noch eweng in dor  
gebirgschn Sproch aagepasst  
vun Schmidti



.... un zwar, an Donnerstich, ne 15.  
Juli, ab 15.00 Uhr, mit ne nächstn  
Event\*:

### *Weltkurerbe in Eibenstock: Einweihung Bergbaulehrpfad*



Do is de große Eiweihingsfeier vu unnern  
Bargbaulehrpfod hintn in dor Grie, kurz vor  
ne Garstnbargweg. Do warn außern unnern  
Landrot aa e schiens paar Leit vu dor  
„Montanrechion“ dorbeisei. Noochn  
Rundgang giehts dann e Stickl an  
Garstnbargweg nauf bis zu dar Blockhitt,

die unner Forscht extra  
dorbaud hat. Un do  
sölls dann aa noch  
ewos ze Schnabbern  
gabn – e Roster halt un  
epperemende aa ewos  
ze trinkn. War do  
ubedingt dorbei sei will,  
dar kaa halt aa gern  
mitkumme.

### Montanlandschaft Eibenstock



Ne Vürbesichtigung hatts schu mol an 15. Juni gabn. Do warn  
unner Bürchermaaster, dor Helm, Thomas als Projektchef, Schürer  
un Schmidt vun EHV un natierlich de wichtichstn wie dor neie Chef  
vu dor Montanrechjon Erzgebirg un seine Mitarbiterin suwie ne  
leitnde Dame vun Denkmolschutz dorbei. Unner Thomas hat iehne  
allis Wichtiche dorzählt, dorläutert, gezeichnet un aa gelei gesaat, wos  
in den Monat noch gebaut ward, un allesamt warns an End zefriedn.

Hier de Hilf vun Eimstocker-Arzgebirgs-Lexikon-Dudn:

**Event - levent** - des is e gresseres geplantis Fast –  
meestns mit e paar bekannte un be-  
deitnde Leit aus dor Kultur un Wirtschaft

## Dorinnerunge an de Wende un wie jeder die Sach aus seiner Sicht dorlabt un empfundn hat.

Su ähnlich wurd iech im vorign Oktober eigelodn, anner grußn Rund teilzenamme, wu jeder seine Eidrick in Beruf, im persönlichn Umfald mit dor Wendezeit dorzähln sollt, ehrlich un frei vu dor Laber wag, wie mor esu socht. Des Ganze hat in Aue stattgefunden, bei dor Angela Klier im „Kompetenzzentrum für Gemeinwesenarbeit und Engagement e.V.“

Wie sichs rausstelln tat, gabs do mehrere Rundn, in meiner war u.a. dor Chef vu de Auer Handballer, dor Chef vun Schachvoren, Rainer Hillebrand (den kennt ball jeder, weil dar jedn hilft, sei richtsche Rente ze kriegn), un dor Richter, Steff vun Blasmusikfast in Schlema. In ner annern Rund war dann dor ehmalische Landrat Kraus, de Ärztin Dr. Sylvia Reich oder aa dor Fußballer Holger Erler.


Die Gespräche hat e guter Konforanzjee ogehalt, dar aa immer wieder mol eigehokt un noochgefreet hat. Aus den vieln unnerschiedlichstn Eidrickn un Geschichtn sollt dann e Büchl warn, des is nu itze rauskumme un werd vu den Zentrum kostnlos in Aue an jedn, dar do Intress hat, ausgabn.



Wos soll iech dä do dorzähln, dacht iech, soll iech ieberhaupt dortn hiegeh? Aber dann ieberleecht iech, meine Arbit im un mit ne Kulturhaus Aue in dare doch usichern Zeit wär do grad richtig. Un esu kunnt iech einichs bericht, was Kaaner su waß, wos aber dorwagn forn Dorhalt von Kulturhaus vu Bedeutung is. Genau zur Wendezeit war iech in Krankenhaus un ward am 13.11.89 an meine Lendnwirbln oporiert un musst ganz schie lang do drinne bleibn, do hab iech den Aafang vorpasst. Des war dozemol e ganz schiens Durchenanner, Kaaner hat su richtig gewusst, wies wetter geht. Wu iech wieder of Arbit war, hieß is gelei, dor alte Direktor muss sein Platz reime. Do musst iech erscht emol amtiern. Dann wurd ieber Stellnabbau diskutiert, mir warn ja mitsamt ne Tanzorchester Aue un allis wos mit ne Haus ze tu hat, 47 Mitarbiter! Wus när halbwegs ohne grusse Eibußn for de Leit gange is, ham mir e paar im aniehdn Rentnalter entlassn. Eh e neier Leiter kam, ham mir schnell in Personalrat gewählt, dodorfu war iech dor Chef und konnt net su aafach iebergange warn. Dann kam aaner, dar hat kaa Aahning vu unnerer Arbit gehatt, un do hat ar miech zu de wichtigstn Entscheidung ins Landratsamt mietgenomme. Su konnt iech viele Sachn noch halbwegs mit klärn un is Beste for uns rausuhn. Des ging ne weil ganz gut, dann tat ar uns ieberall schlacht machen, Briefe an de Oberstn dor Bundesrepublik schreibn un wollt uns mehfach vorkaafn. Dann hat ar siech aber selber e Baa gestellt un Sachn bestellt ohne Dorlaubnis – do is ar gekündicht wurn. Dodorbei musst iech aber zwecks weiterer Eisparunge noch 5 Mitarbeiter entlassn, sugar mei eichne Fraa! Is gab noch viel hie un har, mir sei noch 2 mol bundsweit zen Vorkaaf ausgeschriebn wurn. Dann konnt iech unnern größtn Widersacher vu dor DSU ieberzeign, des de Kultur for de Bevölkerung gebraucht werd. Su wurd im Landratsamt aa Dank vun Landrat Kraus unner Haus behalt. Un do bi iech dorwagn e bissel Stolz drauf, des iech su des Haus mit rettn kunnt. Aa, wenn des nicht mit Eimstock ze tu hat, aber des musst iech emol lus warn!



## De Geschichtnbücher vu unnern EHV

In de Geschichtnbüchle sei de schennstn un lustichstn Beiträch in unnern Blattln vu 2005 bis 2020 drinne. Des sei gesammelte Warke vu ieber ganze 15 Gahrn! E paarle vu eich ham ja schu des aane oder annere Büchl geschenkt kriecht oder aa selberst eigekaft.



Wenn ihr aber vielleicht aans an eure Freinde oder aa Vorwandtn vorschenkn wöllt, müßt mir noch e paarle bei dor Druckerei bestelln. Dodorzu muss mor aber schu wissen, wieviel vu den Dingern gebraucht warn. Ne List zen Eitrogn breng iech emol zu unner nächstn

Hutznobde mit, dann machen mir Nägele mit Köppele. Dor Preis is pro Büchl 7,00 €, dodorvu soll 1 Eurone in de Gemeinschaftskass vu unnern Verein springe.



...un su e 4. Geschichtnbüchl is in Arbit un ball fertich, diesmol e Sammling aus Sch + Sch = Schürer - un Schmidt - Geschichtn!

Do kaa mor siech schu drauf freie.

Glückauf --- eier Schmidtli!